

Submission Date: 1/07/2021 Accepted Date: 14/09/2021 Publication Date: 15/12/2021

**PERANAN PARTI ISLAM SEMALAYSIA (PAS) DALAM PENERAPAN
NILAI EKONOMI POLITIK ISLAM DI MALAYSIA: KAJIAN
TERHADAP UCAPAN DASAR PRESIDEN 2009-2015**

***The Role of Islamic Party of Malaysia (PAS) in the Application of Islamic
Political Economic Values in Malaysia: A Study on the
Presidential Speech 2009-2015***

Muhammad Wafiuddin Rosli^{a1}

^aUniversiti Malaya

¹wafyrosli@gmail.com (corresponding email)

Abstract

Islamic political economy is a field of fusion of two separate components. It is a combination of economic and political, that is, the government's active intervention in economic life according to the requirements of the Shariah. Therefore, this study will analyse the role of The Islamic Party of Malaysia (PAS) in the practice of applying Islamic political economic values in Malaysia. The objective of this study is to examine the application of Islamic political economic values, analyse the application of Islamic political economic values in Malaysia through the role of PAS through the Presidential Speech 2009-2015 and examine issues arising in the implementation of Islamic political economic values by PAS through the Presidential Speech 2009-2015. This study used library research for the purpose of collecting the required data. Then, this study was analysed using inductive and deductive methods to achieve the objectives outlined in this study. The results of the study show that the value of Islamic political economy through the role of PAS is emphasized in every Annual General Meeting.

Keywords: Islamic Political Economy, Economy, Politic.

Abstrak

Ekonomi politik Islam merupakan bidang cantuman dari dua komponen yang berasingan. Ia tercantum antara gabungan ekonomi dan politik iaitu campur tangan pemerintah secara aktif dalam kehidupan ekonomi menurut tuntutan syariat. Oleh itu, kajian ini akan menganalisis peranan Parti Islam Semalaysia (PAS) dalam praktis

penerapan nilai ekonomi politik Islam di Malaysia. Objektif kajian ini adalah untuk mengkaji penerapan nilai ekonomi politik Islam, menganalisis penerapan nilai ekonomi politik Islam di Malaysia melalui peranan PAS menerusi Ucapan Dasar Presiden 2009-2015 serta mengkaji isu-isu yang timbul dalam pelaksanaan penerapan nilai ekonomi politik Islam oleh PAS melalui Ucapan Dasar Presiden 2009-2015. Kajian ini menggunakan kajian perpustakaan bagi tujuan pengumpulan data yang diperlukan. Kemudian, kajian ini dianalisis menggunakan kaedah induktif dan deduktif bagi mencapai objektif yang digariskan dalam kajian ini. Hasil kajian menunjukkan nilai ekonomi politik Islam melalui peranan PAS dititik beratkan dalam setiap kali Mukhtamar Tahunan berlangsung.

Kata kunci: Ekonomi Politik Islam, Ekonomi, Politik.

PENDAHULUAN

Bidang ekonomi dan bidang politik merupakan dua komponen subjek yang berasingan dan berbeza. Adapun ekonomi ia sering ditafsirkan dengan perkiraan matematik yang berkait rapat rumus-rumus penting. Manakala bidang politik pula selalu menjadi kaitan perihal hal ehwal pentadbiran, pengurusan semasa, serta isu-isu parti politik dan konflik peringkat masyarakat, negara serta dunia. Menurut Mark Kesselman¹ beliau menyatakan politik lazimnya membincangkan tiga perkara utama, iaitu perbandingan politik, hubungan antarabangsa, dan teori politik. Manakala dari sudut ekonomi pula Irma Adelman² menyatakan bahawa bidang ekonomi membincangkan negara membangun dan negara mundur, pembangunan ekonomi, pertumbuhan ekonomi, transformasi ekonomi, dan sistem ekonomi.

Merujuk Kamus Dewan Edisi ke-43,³ ekonomi politik bermaksud cabang ekonomi yang menganalisis ekonomi berdasarkan pendekatan politik. Ekonomi politik juga merupakan cabang ilmu politik yang membincangkan pengaruh ekonomi terhadap politik. Bidang ini penting untuk difahami bagi mengetahui bagaimana perkembangan politik sesebuah negara amat dipengaruhi oleh faktor ekonomi. Penumpuannya adalah dari sudut penindasan, kelas dan konflik kelas, hutang luar negara, pelaburan, perkembangan kapitalisme dan sebagainya yang berkaitan ekonomi. Ekonomi politik juga mempunyai pelbagai fokus terhadap persoalan hubungan antara negara miskin dengan negara maju. Disiplin ini merupakan salah

¹ Kesselman, M., Krieger, J., & Joseph, W. A. (2015). *Introduction To Comparative Politics: Political Challenges And Changing Agendas*. Cengage Learning.

² Adelman, I. (1961). *Theories Of Economic Growth And Development*. California: Oxford University Press.

³ Pusat Rujukan Persuratan Melayu @PRPM. (2016, November 11).

satu cabang ilmu sains politik seperti falsafah politik, teori politik, politik Malaysia, dan juga sosiologi politik.

Menurut Yusuf al-Qaradawi⁴ sistem politik Islam ialah semua peraturan am yang dilaksanakan oleh pemerintah dengan matlamat untuk menjaga kepentingan manusia, selagi peraturan-peraturan yang berkaitan tidak bertentangan dengan undang-undang Islam. Kemudian, Sarimah Hanim⁵ menyatakan bahawa ekonomi Islam merupakan dasar-dasar umum ekonomi yang disimpulkan daripada al-Quran dan al-Hadith serta pembangunan perekonomiannya diasaskan pada dasar-dasar tersebut, sesuai dengan keadaan dan masa.

Daripada perbezaan antara politik Islam dan ekonomi Islam, sebenarnya ilmu politik dan ekonomi Islam pada asasnya memiliki kaitan yang amat rapat antara satu sama lain dan tidak dapat dipisahkan daripada garis panduan Islam. Kedua-duanya dititikberatkan dalam Islam dan perlu dimanfaatkan bagi membina kekuatan umat Islam. Akibat daripada itu, lahirnya ilmu yang dinamakan ekonomi politik Islam.

PRINSIP-PRINSIP EKONOMI POLITIK ISLAM

Perbincangan berkenaan dengan konsep ekonomi politik Islam terdapat beberapa prinsip yang wajar dipatuhi bagi mencapai matlamat yang telah digariskan oleh Islam. Sistem yang berkaitan dengan ekonomi politik Islam pastinya ia bersumberkan rujukan agung Islam iaitu al-Quran dan al-Hadith. Apabila sumber ini dijadikan pedoman dalam setiap susun atur ekonomi politik Islam sudah pasti tamadun yang dibina mampu menyeimbangkan antara rohani dan material.

Oleh yang demikian, terdapat dua keseimbangan yang perlu diperolehi oleh manusia iaitu rohani dan material. Dari aspek yang berkaitan kerohanian, konsep hubungan dengan Allah dan hubungan dengan manusia harus diseimbangkan dan bergerak seiring.⁶ Natijahnya, manusia dan alam akan sama-sama menikmati kesejahteraan, keamanan, dan kemakmuran daripada keseimbangan tersebut.

Namun, ekonomi politik Islam juga tidak ketinggalan dalam pembangunan fizikal yang menjadi ukuran terhadap kemajuan. Penyediaan prasarana pembangunan dan program sosioekonomi seperti keperluan hidup, kesihatan, dan pendidikan merupakan keperluan asas bagi pembangunan sesebuah kemajuan. Syed Hussein al-

⁴ Qaradawi, Y., & Ibrahim, A. (2009). *Min Fiqh Al-Daulah Fi Al-Islam Makanatuha, Macalimuha, Tobicatuha, Mauqifuha Min Al-Dimoqratiyyah Wa Al-Tacaddudiyyah Wa Al-Marc'ah Wa Ghairu Al- Muslimin: Fiqh Kenegaraan*. Kuala Lumpur: Blue-T Publication Sdn Bhd.

⁵ Shah, S. H. (2005). *Ekonomi Dari Perspektif Islam*. Fajar Bakti Sdn. Bhd.

⁶ Salleh, H. M. (2009). *Keagungan Tamadun Islam, Satu Model Terbaik Dalam Konteks Pembinaan Tamadun Dunia Kini*.

Atas⁷ menjelaskan bahawa masyarakat itu akan mencapai kemajuan jika anggota-anggotanya yang terbanyak dapat mencukupi keperluan hidupnya sehari-hari. Antara syarat mencapai keperluan hidup yang digariskan, jika dapat tidur mestilah di dalam rumah ataupun sederhana. Tidak boleh tidur di bawah jambatan atau di kaki lima jalan. Oleh sebab itu, bukan kekuatan ekonomi sahaja yang diperlukan untuk memastikan negara aman dan makmur. Begitu juga, bukan atas kekuatan politik semata-mata. Apa yang diperlukan juga ialah keseimbangan rohani dan fizikal. Jadi, gabungan antara ekonomi Islam dan politik Islam diyakini mampu meningkatkan keimanan kepada Allah SWT dan mendapatkan kekuatan bagi membentuk masyarakat ke arah yang lebih baik, di samping mendapatkan keredaan daripada Allah SWT. Hal ini adalah sebagaimana yang ditegaskan oleh Allah SWT:

وَلَوْ أَنَّ أَهْلَ الْقُرَىٰءِ آمَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ
السَّمَاءِ وَالْأَرْضِ وَلَٰكِن كَذَّبُوا فَأَخَذْنَاهُم بِمَا كَانُوا
يَكْسِبُونَ ﴿٩٦﴾

(Al-Quran. Al-A'raf 7: 96)

Terjemahan: Sekiranya penduduk negeri itu beriman dan berkata tentulah Kami akan membuka kepada mereka (pintu pengurniaan) yang melimpah-limpah berkatnya, dari langit dan bumi. Tetapi mereka mendustakan (Rasul Kami), lalu Kami binasakan mereka dengan azab disebabkan apa yang mereka telah usahakan.

Secara ringkasnya, ekonomi politik Islam ialah ilmu bagi mempelajari hubungan antara kerajaan, rakyat, dan pasaran. Hubungan ini diwujudkan bagi membina pemahaman manusia agar dapat menyatukan masyarakat dalam kehidupan bersyariat. Oleh itu, ekonomi politik Islam harus dibangunkan melalui keunggulan ketauhidan terhadap Allah SWT sebagaimana difahami secara teguh dalam sistem syura perlu dipertahankan sebagai proses bagi mengekalkan kekuatan ekonomi politik Islam di dunia agar Islam terus dihormati oleh semua pihak.

⁷ Alatas, S. H. (2015). *Kita Dengan Islam: Tumbuh Tiada Berbuah*. Kuala Lumpur: Dewan Bahasa dan Pustaka.

Matlamat ekonomi politik Islam dapat dibahagikan kepada tujuh perkara⁸ iaitu:

1. Memastikan keperluan hidup masyarakat dipenuhi.
2. Hak keseluruhan masyarakat dilaksanakan dengan adil dan saksama, tanpa mengira agama, budaya dan bangsa.
3. Pengagihan kekayaan diteliti dengan sebaik mungkin bagi memastikan bahawa kekayaan tidak berada pada satu pihak sahaja.
4. Kepimpinan negara mestilah beriman kepada Allah SWT, kuat dan beramanah.
5. Pelaksanaan segala syariah Islam dipatuhi agar seluruh kehidupan masyarakat sentiasa berada dalam rahmat Allah SWT dan jenayah sosial dapat dikurangkan.
6. Pembentukan negara yang baik dan sentiasa mendapatkan keampunan daripada Allah SWT.
7. Keredaan Allah SWT diletakkan sebagai matlamat utama bagi ekonomi politik Islam.

PENGALAMAN PAS DALAM MENGETENGAHKAN PENERAPAN NILAI EKONOMI POLITIK ISLAM MELALUI UCAPAN DASAR PRESIDEN 2009-2015

MUKTAMAR TAHUNAN PAS KALI KE-55⁹

Pada Muktamar ke-55, PAS dengan tegasnya memberikan suatu kerisauan tentang tanggungjawab pemerintah dalam bab mengurus ekonomi negara secara telus dan bertanggungjawab akibat kegawatan ekonomi berpunca dari keruntuhan sistem kewangan barat berteraskan riba, ihtikar, dan gharar.

Oleh itu, PAS telah menggariskan beberapa gesaannya di dalam Muktamar tahun 2009 ini iaitu:

1. Semua syarikat pelaburan berkaitan kerajaan yang menguruskan pelaburan rakyat seperti Permodalan Nasional Berhad (PNB), Lembaga Tabung Haji dan Kumpulan Wang Simpanan Pekerja (KWSP), diuruskan dengan penuh berhemat. Juga dengan tegas, PAS menyatakan keperluan untuk mematuhi kehendak syariah dalam setiap pelaburan tersebut.
2. Lembaga Tabung Haji mesti mampu memenuhi tanggungjawab menjaga kepentingan ekonomi umat Islam dan memastikan setiap pelaburan adalah tidak berasaskan spekulatif dan mengambil kira semua risiko yang terlibat.

⁸ Rosdi, M. S. (2013). *Ekonomi Politik Islam: Teori Dan Falsafah*. Dewan Bahasa dan Pustaka.

⁹ Presiden PAS. (2009, Jun). *Islam Memimpin Perubahan*. Muktamar Tahunan PAS Ke-55.

3. Peringatan PAS kepada semua pihak bahawa keperluan untuk urus tadbir yang baik terhadap segala khazanah kekayaan dan sumber alam yang dianugerahkan di muka bumi ini adalah satu juzu' tuntutan amanah Allah SWT yang diletakkan ke atas manusia selaku khalifah bumi ini.
4. Mestilah mentadbir kewangan dan menjadikan pengurusan ekonomi serta membangunkan harta atau '*Hifz al-Māl*' adalah terkandung juga dalam urusan penting yang disebut sebagai lima keperluan hidup manusia atau '*al-Daruriyyāt al-Khamsah*'. Lima keperluan ini mesti dipelihara dan dimajukan oleh sebuah kerajaan yang dibimbing dan ditadbir oleh syariat Islam.
5. PAS juga menekankan kepentingan menentukan keutamaan dalam kerangka menentukan perbelanjaan, samada perbelanjaan mengurus dan membangun serta persoalan sektor utama dan kritikal yang hendak dibangunkan. Hal ini merujuk kepada kekusaran dalam Pembangunan Kedaulatan dan Keselamatan Pemakanan di Malaysia supaya tidak hilang daya tahan mendepani krisis terutama bab pemakanan.
6. Peringatan PAS bahawa penyelesaian kepada masalah ekonomi manusia bermula dengan memperbetulkan akidah, fikrah dan akhlak, serta iltizam pemimpin kepada tuntutan amanah Allah SWT bagi mentadbir dan memakmurkan bumi dalam rangka tuntutan khilafah dan amanah.
7. PAS mengesyorkan supaya pemimpin dunia kembali kepada Dinar Emas, bagi meletakkan struktur kewangan global berpaksikan emas dan perak untuk menangani ketidaktentuan nilai mata wang dan mengelakkan inflasi akibat perbuatan mencetak wang kertas mengikut Sistem Liberal-Kapitalis.
8. PAS mahukan konsep Pertumbuhan Hijau terus diperkasakan. Bagi PAS, Falsafah Pertumbuhan Hijau amat selari dan sejajar dengan tuntutan tasawur Islam yang menekankan pembangunan dan pertumbuhan mestilah mengambil kira impak kemusnahan kepada alam sekitar dan sumber-sumber serta aset negara yang tidak mampu diganti.
9. PAS menekankan bahawa pembangunan perlu seiring dengan semangat "perkongsian" yang sebenar di antara entiti-entiti perniagaan atas dasar berkongsi dalam keuntungan dan kerugian. Seperti contoh, penswastaan perkhidmatan dan keperluan asas adalah tidak digalakkan kerana pada akhirnya akan membebankan rakyat.

MUKTAMAR TAHUNAN PAS KALI KE-56¹⁰

Pada Muktamar ke-56, PAS menyatakan kekusaran apabila timbul pelbagai malapetaka dalam negara antaranya kekalutan iklim ekonomi Malaysia. Akibat daripada itu, amalan rasuah, menipu, pecah amanah, dan lain-lain berleluasa dalam

¹⁰ Presiden PAS. (2010). *Islam Adil Untuk Semua*. Muktamar Tahunan PAS Ke-56.

negara tanpa ada tindakan yang berani untuk mengatasinya. Walaupun negara kita dikurniakan hasil bumi melimpah ruah, sumber air yang kaya, ibarat semuanya mampu untuk memenuhi keperluan asasi rakyat dan membangun negara. Sungguhpun begitu, ianya tidak dapat mencapai kemajuan kukuh.

PAS mengkritik tindakan kerajaan yang memperkenalkan Model Ekonomi Baru yang masih bersifat orde lama. Hal ini kerana ianya tidak mempunyai roh dan tidak menekankan kepentingan akhlak yang merupakan satu teras terpenting dalam memastikan transparensi dan ketelusan pelaksanaan sesuatu dasar ekonomi. Model Ekonomi Baru ini juga merupakan imbasan kembali konsep pensyarikatan dan penswastaan Malaysia. Pihak kerajaan akan melepaskan kepentingannya dalam sektor perkhidmatan rakyat kepada pihak swasta. Pelepasan tanggungjawab ini bakal melahirkan satu monopoli baru sektor perkhidmatan yang akhirnya menekan ekonomi rakyat.

PAS juga mengingatkan bahawa penglibatan kerajaan atau orang-orangnya yang bersaing dengan kegiatan ekonomi rakyat menimbulkan rasa tidak senang di antara satu sama lain. Semua perkara tersebut bakal menimbulkan rasa benci-membenci di antara kaum dan dalam kalangan sesama kaum.

Kekesalan PAS terhadap tindakan kerajaan yang menggambarkan mereka seolah-olah muflis idea pembangunan ekonomi iaitu memperkenalkan lesen judi bola adalah satu tindakan yang jauh menyimpang dari ajaran Islam dan tatacara kehidupan yang diterima oleh masyarakat. Tindakan ini sedang membawa negara mundur ke belakang ke arah yang lebih jauh dari ajaran Islam.

MUKTAMAR TAHUNAN PAS KALI KE-57¹¹

Muktamar ke-57 dalam menghadapi kemelut ekonomi, PAS kembali menegaskan bahawa menguruskan khazanah kekayaan negara mesti berpaksikan matlamat untuk memakmurkan seluruh penghuni muka bumi ini sesuai dengan peranannya selaku Khalifah Allah SWT. Oleh itu, PAS menyatakan bahawa sesebuah kerajaan mestilah menyerlahkan dan mengoperasikan penghayatan ini, bukan hanya pada tahap memperkenalkan polisi-polisi semata-mata bahkan lebih penting adalah dalam sistem penyampaian.

PAS melalui persepakatan politik bersama parti-parti pembangkang membentuk Pakatan Rakyat telah menerbitkan dokumen penyelesaian alternatif kepada kemelut ekonomi negara yang berlaku diperincikan dalam Buku Jingga. Di dalam dokumen Buku Jingga tersebut, pendekatan agenda membetulkan urustadbir ekonomi adalah menekankan suatu 'Perubahan Ekonomi' hanya akan dapat direalisasikan oleh sesebuah kerajaan melalui pelaksanaan 'Reformasi Politik'.

¹¹ Presiden PAS. (2011). *Membangun Negara Berkeadilan*. Muktamar Tahunan PAS Ke-57.

MUKTAMAR TAHUNAN PAS KALI KE-58¹²

Muktamar ke-58, PAS menimbulkan kecahnaan terhadap barah politik menipu dan ekonomi berpusing kekayaan dalam kalangan kelompok tertentu iaitu kalangan ahli politik dan ahli ekonomi yang bersekongkol dengannya. Akhirnya jika tidak dibendung akan melahirkan kumpulan manusia yang mengumpul kekayaan melalui monopoli tamak haloba, riba, rasuah dan lain-lain lagi.

Atas sebab tersebut, PAS ingin cuba mengambil langkah penting sekiranya diberi peluang untuk mentadbir negara Malaysia ini iaitu:

1. Membetulkan falsafah ekonomi sedia ada kepada yang lebih adil dan memakmurkan. Seperti contoh, dasar fiskal mahupun monetari yang adil sifatnya mesti digunakan sebaiknya untuk memacu pertumbuhan.
2. Membetulkan pelaksanaannya dengan bersendikan akhlak dan perkiraan dosa pahala, akauntabiliti yang holistik, undang-undang yang mampu mencegah dan seterusnya mencegah pembaziran, ketirisan, penyelewengan serta rasuah.
3. Membuat penilaian menyeluruh terhadap hasil negara, supaya pengurusan warisan khazanah negara ini dimanfaatkan dengan lebih telus dan adil untuk semua rakyat.
4. Menolak diskriminasi dasar ekonomi dan sifat kebajikannya dilaksanakan tanpa mengira kaum, agama, ataupun fahaman politik dengan merujuk kepada keadilan Islam sebenar.
5. Tanggungjawab pemerintah dan memakmurkan bumi ini adalah satu amanah yang mesti ditunaikan. Ia bukan sahaja untuk memenuhi tuntutan rakyat yang mengangkat sesebuah kerajaan bahkan pada kemuncaknya supaya kepimpinan negara bertanggungjawab kepada Allah SWT.

MUKTAMAR TAHUNAN PAS KALI KE-59¹³

Pada muktamar ke-59 ini, isu yang menjadi seruan PAS adalah kritikan terhadap pelaksanaan GST yang menggantikan SST pada pembentangan Bajet 2014 lalu. Pelaksanaan ini membawa pendirian kepada PAS bahawa ia adalah sistem cukai yang salah. Hujah yang dikemukakan adalah ia diperkenalkan tanpa mengambil kira pendapatan rakyat yang wajib disaksamakan dengan perkembangan inflasi yang lemah dan akhirnya menjadikannya satu sistem percukaian yang tidak adil.

Oleh itu, PAS memperkenalkan tentang struktur sistem percukaian Islam yang tersendiri berbanding sistem percukaian moden. Secara perbandingan, sistem percukaian moden boleh dikenakan oleh kerajaan ke atas rakyat tanpa mengira

¹² Presiden PAS. (2012). *Negara Berkeadilan Teras Perpaduan*. Muktamar Tahunan PAS Ke-58.

¹³ Presiden PAS. (2013, November). *Rahmat Untuk Semua*. Muktamar Tahunan PAS Ke-59.

samada cukai tersebut dikenakan oleh kerajaan ke atas barangan keperluan atau transaksi rakyat. Ini berbeza dari segi cukai menurut Islam yang hanya dikenakan ke atas sesuatu yang mendatangkan keuntungan, pulangan dan kemasukan rakyat dan bukan atas keperluan transaksi mereka.

Hal ini kerana sistem cukai Islam yang menjadi instrumen kepada sistem ekonomi negara Islam adalah untuk memastikan kuasa beli rakyat stabil dan kukuh. Justeru itu, bukan isu buruk atau baik GST yang diperkenalkan oleh kerajaan tetapi dari perspektif penglihatan dan penilaian orang kebanyakan. Mengenakan GST mungkin baik pada pandangan ekonomi moden konvensional tetapi ia memberi kesan buruk kepada pendapatan simpanan rakyat dan kuasa beli yang semakin mengecil.

MUKTAMAR TAHUNAN PAS KALI KE-60¹⁴

Pada Muktamar ke-60 ini, PAS beranggapan daya tahan ekonomi Malaysia masih belum kukuh lagi walaupun kerajaan mengumumkan prestasi terkini ekonomi negara. Hal ini kerana jika diambil kira hutang sektor awam yang masih tinggi dan defisit bajet negara yang masih tinggi.

Oleh itu, PAS begitu komited untuk terus berusaha membanteras kewujudan jurang kaya-miskin yang semakin melebar serta pembolotan kekayaan negara oleh segelintir manusia yang kaya akibat dari amalan memanipulasi pasaran. Atas alasan inilah yang menyebabkan tidak berlakunya persaingan sihat dan terbuka serta diparahkan lagi dengan amalan kronisme-nepotisme.

Kemudian, PAS juga menuntut agar sistem cukai pendapatan dikaji semula kerana disitu wujud ketidakadilan dari segi cukai yang dikenakan kepada golongan berpendapatan sederhana berbanding yang sangat kaya. Hal ini begitu jelas sekali memberikan tekanan kepada golongan berpendapatan sederhana berbanding berpendapatan kaya yang begitu selesa dan bercanggah dengan panduan Syariah.

MUKTAMAR TAHUNAN PAS KALI KE-61¹⁵

Muktamar PAS ke-61 menyebut tentang kerosakan nyata mazhab ekonomi samada Liberal Kapitalisma dan Sosialisma. Melihat kepada perkara itu, PAS menyatakan bahawa Islam adalah berbeza dengan semuanya. Hal ini kerana Islam tidak menjadikan kebendaan sebagai dasar dan matlamat. Bahkan Islam meletakkan manusia adalah modal ekonomi yang sangat penting untuk dibangun mengikut segala aspek fitrahnya, roh, jasad, individu, keluarga dan masyarakat.

Selain itu, PAS menegur kerajaan ke atas ketidakwajaran memangsakan simpanan rakyat dan dana rakyat dalam apa jua tabung sekalipun samada KWSP,

¹⁴ Presiden PAS. (2014, November). *Terus Beristiqamah*. Muktamar Tahunan PAS Ke-60.

¹⁵ Presiden PAS. (2015, November). *Beristiqamah Hingga Kemenangan*. Muktamar Tahunan PAS Ke-61.

LTH dan sebagainya apabila pengurusan kewangan negara menghadapi kekalutan. PAS menekankan bahawa kerajaan yang diberi mandat oleh rakyat perlu bertanggungjawab untuk menunaikan amanah dan harapan rakyat terbanyak. Tugas pemerintahan telah dijelaskan oleh Allah SWT dalam al-Quran iaitu:

﴿وَالِى ثَمُودَ أَخَاهُمْ صَالِحًا قَالَ يَاقَوْمِ اعْبُدُوا اللَّهَ مَا لَكُم مِّنْ إِلَٰهٍ غَيْرُهُ هُوَ أَنشَأَكُم مِّنَ الْأَرْضِ وَاسْتَعْمَرَكُمْ فِيهَا فَاسْتَغْفِرُوهُ ثُمَّ تَوْبُوا إِلَيْهِ إِنَّ رَبِّي قَرِيبٌ مُّجِيبٌ﴾

(Al-Quran. Surah Hud 11: 61)

Terjemahan: Dan kepada kaum Thamud, Kami utuskan saudara mereka: Nabi Soleh. Beliau berkata: Wahai kaumku! Sembahlah kamu akan Allah! Sebenarnya tiada tuhan bagi kamu selain daripadaNya. Dialah yang menjadikan kamu dari bahan-bahan bumi, serta menghendaki kamu memakmurkannya. Oleh itu mintalah ampun kepada Allah dari perbuatan syirik, kemudian kembalilah kepadaNya dengan taat dan tauhid. Sesungguhnya tuhanku sentiasa dekat, lagi sentiasa memperkenankan permohonan hambaNya.

ISU-ISU YANG DIBANGKITKAN

Huraian isu yang menjadi perbincangan dan dibangkitkan dalam ucapan dasar Presiden ini dipilih berdasarkan matlamat ekonomi dan sosial Islam yang telah disenaraikan oleh Surtahman Kastin Hasan¹⁶ iaitu:

1. Kesejahteraan ekonomi bagi individu dan masyarakat serta negara amnya.
2. Keperluan asas yang mencukupi.
3. Penggunaan sumber yang optimum, cekap, dan tidak membazir.
4. Kesaksamaan agihan harta, kekayaan, pendapatan dan pembangunan.
5. Menjamin kebebasan individu.

¹⁶ Hasan, S. K., & Ahmad, S. (2001). *Ekonomi Islam: Dasar dan Amalan*. Dewan Bahasa Dan Pustaka.

6. Kesamaan hak dan peluang.

7. Kerjasama keadilan.

TUNTUTAN URUSTADBIR DAN PENGURUSAN EKONOMI

Seperti yang telah dibincangkan pada bab sebelum ini, keperluan untuk urustadbir yang baik terhadap segala khazanah kekayaan dan sumber alam yang dianugerahkan di muka bumi ini adalah satu bahagian tuntutan amanah Allah SWT yang diletakkan ke atas manusia selaku khalifah bumi ini. Ianya mesti menjadi suatu kesedaran dan tuntutan untuk menghayatinya khas buat kerajaan atau pemimpin yang mentadbir dan mengurus negara ini. Hal ini kerana melalui prinsip yang diajar oleh Islam ini, jika tidak dapat dihayati dengan sebaiknya maka akan berlaku kekayaan yang berpusing dalam kalangan orang-orang tertentu sebagaimana firman Allah SWT:

مَا آفَاءَ اللَّهُ عَلَى رَسُولِهِ مِنْ أَهْلِ الْقُرَىٰ فَلِلَّهِ وَلِلرَّسُولِ وَلِذِي الْقُرْبَىٰ
وَالْيَتَامَىٰ وَالْمَسْكِينِ وَأَبْنِ السَّبِيلِ كَيْ لَا يَكُونَ دُولَةً بَيْنَ الْأَغْنِيَاءِ
مِنْكُمْ وَمَا آتَاكُمُ الرَّسُولُ فَخُذُوهُ وَمَا نَهَاكُمْ عَنْهُ فَانْتَهُوا وَاتَّقُوا
اللَّهَ إِنَّ اللَّهَ شَدِيدُ الْعِقَابِ



(Al-Quran. Al-Hashr 59: 7)

Terjemahan: Apa yang Allah kurniakan kepada RasulNya (Muhammad) dari harta penduduk negeri, bandar atau desa dengan tidak berperang, maka adalah ia tertentu bagi Allah dan bagi orang miskin, serta orang-orang Rasulullah, dan bagi kaum kerabat (Rasulullah), dan anak-anak yatim, dan orang-orang musafir, serta orang-orang musafir (yang keputusan). (Ketetapan yang demikian) supaya harta itu tidak hanya beredar diantara orang-orang kaya dalam kalangan kamu. Dan apa jua perintah yang dibawa oleh Rasulullah kepada kamu maka terimalah serta amalkan, dan apa jua yang dilarangNya untuk kamu melakukannya maka patuhilah laranganNya. Dan bertaqwalah kamu kepada Allah, sesungguhnya Allah amatlah berat azab seksanya (bagi orang-orang yang melanggar perintahNya).

Oleh itu, terdapat beberapa polemik yang mendapat perhatian dalam Ucapan Dasar Presiden 2009¹⁷ berkait dengan keperluan bertindak untuk mengurustadbir secara baik terhadap khazanah bumi iaitu berkenaan keaiban negara dengan ketidakcukupan pemakanan seperti beras, walaupun pada hakikatnya negara ini dilimpahi dengan tanah pertanian yang kaya. Hal yang demikian berlawanan dengan matlamat ekonomi dan sosial Islam yang telah disenaraikan oleh Surtahman Kastin Hasan¹⁸ iaitu penggunaan sumber yang optimum, cekap, berkesan, jimat dan tidak membazir.

Walaupun ramai yang mengetahui bahawa negara sedang menuju kepada transformasi negara industri maju. Sebaliknya kerajaan perlu juga membuat pembelajaran melalui penyelidikan dan pembangunan dengan mengambil contoh negara gergasi yang maju yang lain seperti UK, Jepun, Amerika dan Eropah. Kesemua negara maju di dunia ini mempunyai 'Kedaulatan dan Keselamatan Pemakanan' untuk mempunyai daya tahan bagi mendepani pelbagai krisis termasuklah pemakanan.

Pada Muktamar Tahunan PAS ke-56¹⁹ menyebutkan bahawa tindakan kerajaan memperkenalkan Model Ekonomi Baru yang juga dilihat masih bersifat order lama itu merupakan suatu tindakan tidak cermat kerajaan dalam mengurus khazanah kekayaan negara yang berpaksi matlamat memakmurkan rakyat dengan peranan selaku khalifah Allah SWT. Namun, menurut Surtahman Kastin Hasan²⁰ keperluan kerajaan dalam mengurus khazanah kekayaan negara perlu memiliki alat-alat ekonomi yang luas merangkumi aspek berkaitan lahir dan zahiri, iaitu bermula daripada pendidikan rohani dan galakan moral sehinggalah pentadbiran jentera ekonomi secara langsung meliputi alat-alat pengeluaran, fiskal, kewangan dan agihan.

Model Ekonomi Baru ini merupakan sekadar imbasan kembali kepada konsep pensyarikatan dan penswastan Malaysia yang dilaksanakan oleh pemimpin sebelumnya. Operasinya ialah kerajaan akan melepaskan kepentingannya sedikit demi sedikit dalam sektor perkhidmatan rakyat kepada pihak swasta. Pada hakikatnya, walaupun kerajaan memberikan jaminannya tetapi pelepasan tanggungjawab kerajaan itu telah melahirkan satu monopoli baru sektor perkhidmatan yang akhirnya akan menekan ekonomi rakyat.

Namun kajian ini mengkritik sangkaan PAS kerana kebaikan konsep pensyarikatan dan penswastan ini tidak boleh dinafikan secara total. Seperti contoh penswastan syarikat telekomunikasi yang akan memberikan kesan pihak syarikat tersebut untuk bersaing dengan beberapa syarikat telekomunikasi yang lain. Daripada

¹⁷ Presiden PAS. (2009, Jun). *Islam Memimpin Perubahan*. Muktamar Tahunan PAS Ke-55.

¹⁸ Hasan, S. K., & Ahmad, S. (2001). *Ekonomi Islam: Dasar dan Amalan*. Kuala Lumpur: Dewan Bahasa Dan Pustaka.

¹⁹ Presiden PAS. (2010). *Islam Adil Untuk Semua*. Muktamar Tahunan PAS Ke-56.

²⁰ Hasan, S. K., & Ahmad, S. (2015). *Ekonomi Islam: Peranan Pemerintah*. Kuala Lumpur: Dewan Bahasa Dan Pustaka.

persaingan tersebut, ia telah memberikan manfaat kepada rakyat untuk memilih dan menikmati tawaran yang paling terbaik antara syarikat telekomunikasi yang menawarkan perkhidmatan. Seperti contoh, rakyat pastinya mempunyai pilihan untuk pembelian Kad Sim Telefon Mudah Alih dengan variasi pilihan yang mampu milik akibat berlaku persaingan antara Syarikat Telekomunikasi dalam negara. Apabila berlaku persaingan, semestinya harga barang tersebut akan menjadi lebih murah untuk menarik minat rakyat membelinya.

Prinsip yang diajar Islam ini, memandu sesebuah kerajaan itu untuk menyerlahkan dan mengoperasikan penghayatan ini bukan hanya pada tahap memperkenalkan polisi-polisi semata-mata bahkan utamanya adalah dalam sistem penyampaian. Hal ini kerana, bagi memastikan pengagihan kesejahteraan ekonomi itu sampai kepada rakyat di bawah yang memerlukan. Ia bertepatan dengan kaedah meletakkan keutamaan mendahulukan yang lebih penting dari yang penting. Natijahnya, akan menjauhkan negara kepada perbelanjaan yang salah dari segi keutamaan.

PENGURUSAN KERANGKA KEWANGAN YANG ADIL DAN LESTARI

Negara mempunyai hasil dan sumber asli yang melimpah, semestinya ia juga memerlukan dasar fiskal yang murni dan pentadbiran yang beramanah. Kerajaan melalui agensi kewangan berpusat mesti bertanggungjawab menentukan pasaran kewangan yang adil dan lestari bagi menatijahkan budaya akauntabiliti, kebertanggungjawaban, etika dan ketelusan. Hal ini bertepatan dengan catatan Surtahman Kastin Hasan²¹ dalam menyenaraikan matlamat ekonomi dan sosial Islam iaitu kesaksamaan agihan harta, kekayaan, pendapatan dan pembangunan. Natijahnya, sistem kewangan ini akan dapat menjana ekonomi melalui aktiviti pelaburan yang adil dan peluang pekerjaan yang bertanggungjawab.

Bagi isu kerangka pengurusan kewangan ini, Ucapan Dasar Presiden 2013²² telah menyatakan kerisauan penurunan penarafan Malaysia sebagai A 'minus' (A-) dari stabil pada bulan Julai kepada negatif pada oleh 'Fitch Rating' iaitu sebuah Badan Penarafan Antarabangsa di Hong Kong.²³ Impaknya, perubahan ini mengakibatkan tekanan kos pinjaman seperti bon dan juga hilang tarikan negara sebagai destinasi pelaburan. Akhirnya, negara tidak berlaku aliran putaran wang yang baik oleh pelabur asing yang melabur di negara ini. Ini bermakna pengurusan yang tidak cekap dalam urusan kewangan akan mengakibatkan kerugian negara yang dahsyat. Oleh itu, kajian

²¹ Hasan, S. K., & Ahmad, S. (2001). *Ekonomi Islam: Dasar dan Amalan*. Kuala Lumpur: Dewan Bahasa Dan Pustaka.

²² Presiden PAS. (2013, November). *Rahmat Untuk Semua*. Muktamar Tahunan PAS Ke-59.

²³ Staff, R. (2013, July 30). *RPT-Fitch revises Malaysia's outlook to negative; affirms IDRs at 'A-'/A'*. U.S.

ini mendapati urusan kewangan ini perlu dipimpin oleh mereka yang berpengalaman dan berkemahiran untuk mengendalikan.

PELAKSANAAN ZAKAT DAN CUKAI SECARA ISLAM

Zakat adalah konsep kebajikan mengumpulkan hasil dan mengagihkan secara adil dan diiktiraf sebagai ibadat bagi penganut Islam. Zakat tidak diurus oleh kerajaan tetapi diwajibkan oleh penganut Islam dan tidak wajib bagi bukan penganut Islam. Zakat wajib untuk dikekalkan sepanjang tempoh pemerintah sesebuah kerajaan berlaku. Hal ini kerana ia adalah ibadat harta yang menjadi syarat dalam rukun Islam.

Berbeza tentang konsep cukai, ianya tidak langsung berkait dengan ibadah samada kepada penganut Islam dan juga penganut bukan Islam. Di antara perkara yang menjadi kutipan cukai antaranya samada sumber asli atau percukaian ke atas ekonomi rakyat. Islam mengajar cukai diambil daripada golongan yang berada, tidak membebankan rakyat miskin dan menganggur. Pengagihan cukai ini mestilah dengan konsep adil untuk rakyat dan perbelanjaan urusan kerajaan tidak bakhil dan boros.

Bajet 2014 telah dibentangkan oleh kerajaan tentang pelaksanaan GST daripada sistem SST pada sebelumnya. Dalam Ucapan Dasar Presiden 2013²⁴ telah disebutkan pendirian PAS bahawa ianya adalah suatu cukai yang salah. Hal ini kerana kerajaan memperkenalkan GST ini tanpa mengambil kira pendapatan rakyat yang wajib di saksamakan dengan perkembangan inflasi yang lemah yang dikawal kerajaan menjadikan ia sebuah sistem yang tidak adil. Islam mengajar bahawa sistem percukaian boleh dikenakan oleh kerajaan ke atas rakyat tanpa mengira samada ia dikenakan ke atas barangan keperluan atau transaksi rakyat. Prinsip Islam ini menyatakan cukai hanya dikenakan ke atas sesuatu yang mendatangkan keuntungan, pulangan dan kemasukan rakyat. Namun, bukan atas keperluan dan transaksi kepentingan kerajaan semata-mata.

Ucapan Dasar Presiden tahun 2014²⁵ pula, PAS mendesak supaya kerajaan membatalkan GST kerana ekosistem ekonomi Malaysia dan suasana mikro dan makro ekonomi Malaysia masih tidak bersedia untuk GST. Kemudian, selain GST gesaan PAS kepada kerajaan supaya mengkaji semula sistem cukai pendapatan kerana wujud di situ ketidakadilan dari segi cukai yang dikenakan kepada golongan berpendapatan sederhana berbanding yang sangat kaya. Antara saranan yang diberikan kepada pihak kerajaan adalah menghentikan pemberian Approved Permit (AP)²⁶ kepada kroni berkaitan untuk memberi janaan maksimum kepada hasil untuk negara berbanding langkah GST yang membebankan rakyat umumnya.

²⁴ Presiden PAS. (2013, November). *Rahmat Untuk Semua*. Muktamar Tahunan PAS Ke-59.

²⁵ Presiden PAS. (2014, November). *Terus Beristiqamah*. Muktamar Tahunan PAS Ke-60.

²⁶ Approved Permit (AP) adalah lesen import dan eksport yang dikeluarkan oleh Permit Issuing Agencies (PIAs) di bawah Akta Kastam 1967.

Namun, perubahan dasar cukai kepada Cukai Barang dan Perkhidmatan (GST) ini adalah untuk menampung segala kekurangan yang terdapat pada Cukai Jualan dan Perkhidmatan (SST). Kajian mendapati bahawa SST mempunyai kelemahan tertentu seperti cukai berganda ke atas pengguna, ketiadaan pelepasan cukai keatas barang yang dieksport dan isu pindahan harga.²⁷ Atas kelemahan ini, GST diperkenalkan untuk mengatasi segala kelemahan tersebut. Bahkan majoriti negara dalam dunia ini sudahpun melaksanakan GST ini sebagai cukai yang memajukan negara.

TUNTUTAN PEMATUHAN PIAWAIAN SYARIAH

Syariah merupakan manual yang datangnya daripada Allah sebagai aturan hidup manusia sejagat bagi segala jenis permasalahan yang berkait ibadah, muamalat, akhlak dan sebagainya. Sepertimana firman Allah SWT:

ثُمَّ جَعَلْنَاكَ عَلَىٰ شَرِيعَةٍ مِّنَ الْأَمْرِ فَاتَّبِعْهَا وَلَا تَتَّبِعْ أَهْوَاءَ الَّذِينَ لَا يَعْلَمُونَ ﴿١٨﴾

(Al-Quran. Surah al-Jathiah 45: 18)

Terjemahan: Kesudahannya Kami jadikan engkau (wahai Muhammad dan diutuskan engkau) menjalankan satu Syariat (yang cukup lengkap) dari hukum-hukum agama; maka turutlah Syariah itu, dan janganlah engkau menurut hawa nafsu orang-orang yang tidak mengetahui (perkara yang benar).

Oleh itu, gesaan PAS di dalam Muktamar Tahunan 2009 kepada seluruh syarikat pelaburan yang berkaitan kerajaan agar menguruskan pelaburan rakyat seperti Kumpulan Wang Simpanan Pekerja (KWSP) diuruskan dengan penuh berhemat. Pengurusan yang berhemat yang dimaksudkan adalah pematuhan kepada kehendak yang ditetapkan oleh Syariah dalam setiap pelaburan tersebut.

Kemudian, pada sidang Parlimen bertarikh 26 Mei 2015¹⁵, ahli Parlimen PAS dari Temerloh telah mengutarakan soalan mengenai cadangan portfolio pelaburan patuh Syariah terhadap pencarum KWSP kepada Timbalan Menteri Kewangan. Antara pandangan yang diutarakan ialah cadangan penubuhan Majlis Penasihat Syariah (MPS) kepada KWSP. Ia bertujuan supaya proses menubuhkan skim simpanan patuh syariah itu dapat berjalan dengan lancar dan mencapai standard sistem kewangan Islam yang

²⁷ Ayop Razid, "Sistem percukaian terbaik atasi kelemahan SST," *Berita Harian*, 5 November 2013, 30.

sebenar. Akhirnya, pada sesi Parlimen Oktober 2015, akaun KWSP-Islamik diwujudkan bagi memenuhi hasrat pencarum beragama Islam di negara ini.

KESIMPULAN

Kajian ini menyimpulkan bahawa terdapat empat isu yang perlu dititik berat bagi memastikan pelaksanaan penerapan nilai ekonomi politik Islam ini benar-benar dapat direalisasikan. Isu-isu tersebut adalah isu berkenaan tuntutan urustadbir dan pengurusan ekonomi, pengurusan kerangka kewangan yang adil dan lestari, pelaksanaan zakat dan cukai secara Islam, dan tuntutan pematuhan piawaian Syariah.

Oleh itu, kajian telah menyenaraikan isu-isu tersebut berpandukan matlamat ekonomi dan sosial Islam dengan mengambil sandaran dari Surtahman Kastin Hasan²⁸ dan memilih empat isu utama yang dititik beratkan dalam Muktamar Tahunan 2009 hingga 2015 secara berjadual seperti berikut Jadual 1.

Isu \ Muktamar	2009	2010	2011	2012	2013	2014	2015
Tuntutan Urustadbir dan Pengurusan Ekonomi	/	/					
Pengurusan Kerangka Kewangan yang Adil dan Lestari					/		
Pelaksanaan Zakat dan Cukai Secara Islam					/	/	
Tuntutan Pematuhan Piawaian Syariah	/						

Jadual 1

Berdasarkan Jadual 1, dapat merumuskan bahawa kekerapan yang timbul terhadap isu tuntutan urustadbir dan pengurusan ekonomi hanyalah pada Muktamar Tahunan 2009 dan 2010. Manakala, isu mengenai pengurusan kerangka kewangan yang adil dan lestari pula hanya menjadi perbincangan pada Muktamar 2013 sahaja. Kemudian, Muktamar PAS pada tahun 2013 dan 2014 pula menimbulkan isu pelaksanaan zakat dan cukai secara Islam dalam Ucapan Dasar Presiden. Akhir sekali, isu tuntutan pematuhan piawaian Syariah menjadi perbincangan ucapan dasar Presiden pada Muktamar 2009 sahaja.

Apa yang boleh ditafsir daripada Jadual 1 ini, PAS dilihat tidak konsisten dalam menekankan empat isu utama ini untuk diperbahas pada setiap kali Muktamar diadakan

²⁸ Hasan, S. K., & Ahmad, S. (2001). *Ekonomi Islam: Dasar dan Amalan*. Kuala Lumpur: Dewan Bahasa Dan Pustaka.

mulai 2009 hingga 2015. Empat isu penting ini tidak menjadi perbincangan yang diulang pada setiap kali Muktamar Tahunan diadakan sehingga ia berjaya dilaksanakan. Namun, empat isu ini sekadar diangkat pada Muktamar Tahunan tertentu berdasarkan isu persekitaran yang berlaku. Namun, ketegasan untuk merealisasikannya masih dilihat begitu longgar.

Secara kesimpulannya, apa sahaja isu-isu yang dibangkitkan dalam Ucapan Dasar Presiden 2009 hingga 2015 ini hanya mampu diaplikasikan secara keseluruhan sekiranya PAS berjaya menjadi kerajaan persekutuan ataupun kerajaan yang semasa menerima segala tuntutan ini untuk diangkat menjadi dasar negara dalam pentadbiran ekonomi politik Islam di Malaysia.

PENGHARGAAN

Penulisan ini merupakan sebahagian dari Projek Penulisan Tahun Akhir bagi memenuhi keperluan Ijazah Sarjana Muda di Akademi Pengajian Islam, Universiti Malaya. Ribuan terima kasih ditujukan kepada Dr. Mohammad Taquiuddin bin Mohamad sebagai penyelia di atas tunjuk ajar dan bimbingan sepanjang penulisan ini disiapkan.

RUJUKAN

- Adelman, I. (1961). *Theories of Economic Growth And Development*. California: Oxford University Press.
- Alatas, S. H. (2015). *Kita Dengan Islam: Tumbuh Tiada Berbuah*. Kuala Lumpur: Dewan Bahasa dan Pustaka.
- Ayob, R. (2013, November 5). Sistem Percukaian Terbaik Atasi Kelemahan Sst. *Berita Harian*, p. 30. <https://www.klik.com.my/item/story/6446208/sistem-percukaian-terbaik-atasi-kelemahan-sst>
- Hasan, S. K., & Ahmad, S. (2001). *Ekonomi Islam: Dasar dan Amalan*. Kuala Lumpur: Dewan Bahasa Dan Pustaka.
- Hasan, S. K., & Ahmad, S. (2015). *Ekonomi Islam: Peranan Pemerintah*. Kuala Lumpur: Dewan Bahasa Dan Pustaka.
- Kesselman, M., Krieger, J., & Joseph, W. A. (2015). *Introduction To Comparative Politics: Political Challenges and Changing Agendas*. Cengage Learning.
- Presiden PAS. (2009, June). *Islam Memimpin Perubahan* [Conference session]. Muktamar Tahunan PAS Ke-55. <http://muktamar.pas.org.my/wp-content/uploads/2017/03/Ucapan-Dasar-Muktamar-Tahunan-PAS-Kali-Ke-55-2009-BM.pdf>.

- Presiden PAS. (2010). *Islam Adil Untuk Semua* [Conference session]. Mukhtar Tahunan PAS Ke-56. <https://www.scribd.com/doc/32883397/Ucapan-Dasar-Presiden-Muktamar-Pas-ke-56-tahun-2010>.
- Presiden PAS. (2011). *Membangun Negara Berkeadilan* [Conference session]. Mukhtar Tahunan PAS Ke-57. file:///C:/Users/Used/Downloads/Ucapan+Dasar+Presiden+PAS+Muktamar+Tahunan+PAS+ke-57.pdf.
- Presiden PAS. (2012). *Negara Berkeadilan Teras Perpaduan* [Conference session]. Mukhtar Tahunan PAS Ke-58. <http://muktamar.pas.org.my/wp-content/uploads/2017/03/Ucapan-Dasar-Muktamar-Tahunan-PAS-Kali-Ke-58.pdf>.
- Presiden PAS. (2013, November). *Rahmat Untuk Semua* [Conference session]. Mukhtar Tahunan PAS Ke-59. file:///C:/Users/Used/Downloads/Ucapan-Dasar-Presiden-Muktamar-Tahunan-PAS-Kali-Ke-59-Rahmat-Untuk-Semua.pdf.
- Presiden PAS. (2014, November). *Terus Beristiqamah* [Conference session]. Mukhtar Tahunan PAS Ke-60. file:///C:/Users/Used/Downloads/Ucapan-Dasar-2014.pdf
- Presiden PAS. (2015, November). *Beristiqamah Hingga Kemenangan* [Conference session]. Mukhtar Tahunan PAS Ke-61. file:///C:/Users/Used/Downloads/Ucapan-Dasar-Presiden-PAS-Muktamar-2015.pdf.
- Pusat Rujukan Persuratan Melayu @PRPM. (2016, November 11). <https://prpm.dbp.gov.my/>.
- Qaradawi, Y., & Ibrahim, A. (2009). *Min Fiqh Al-Daulah Fi Al-Islam Makanatuha, Macalimuha, Tobicatuha, Mauqifuha Min Al-Dimoqratiyyah Wa Al-Tacaddudiyyah Wa Al-Marc'ah Wa Ghairu Al-Muslimin: Fiqh Kenegaraan*. Kuala Lumpur: Blue-T Publication Sdn Bhd.
- Rosdi, M. S. (2013). *Ekonomi Politik Islam: Teori Dan Falsafah*. Kuala Lumpur: Dewan Bahasa dan Pustaka.
- Salleh, H. M. (2009). *Keagungan Tamadun Islam, Satu Model Terbaik Dalam Konteks Pembinaan Tamadun Dunia Kini*.
- Shah, S. H. (2005). *Ekonomi Dari Perspektif Islam*. Fajar Bakti Sdn. Bhd.
- Staff, R. (2013, July 30). *RPT-Fitch revises Malaysia's outlook to negative; affirms IDRs at 'A-/A'*. U.S. <https://www.reuters.com/article/fitch-revises-malaysias-outlook-to-negatidUSFit66566620130730>.

BIODATA PENULIS

Muhammad Wafiuddin bin Rosli merupakan bekas pelajar di Akademi Pengajian Islam, Universiti Malaya dalam jurusan Syariah dan Ekonomi. Kini beliau merupakan eksekutif Syariah di salah sebuah institusi kewangan Islam di Kuala Lumpur.